

OTE MA CHUOK

**MA KONYO NG'ATO KUOM YANGO MATUT NI TO
DIN MA RATIRO EN DIN MANE.**

JANDIKO: SALEH M. KYAMBO

JALOKO E DHOLUO: OMAR AL-BASHIR

OTE MACHUOK.

copyright © Hidayat Creativity, publishing Department.

P.O. BOX 44799, 00100, GPO, NAIROBI-KENYA.

**Ratiro mar ndiko oriti. Ok oyieni pimo, ndiko, loko,
Chwado mang'eny bugni eyoo moro amora mak mana ka omiyi
Thuolono gi joka Hidayat Creativity e yor oboke.**

Jandiko: Saleh M. Kyambo.

Ma en buk molosi mamiyo josomo resruok kuom dwaro ng'eyo yoo mar din moriere mar Ruoth Nyasaye.

Maling'ling' moloso bugni owuok enonro matut ma otim ei Muma Maler to gi Quran Mopuodhi. Ok nekech buge ariyo gi e buge marahuma miwuoro e wang' piny ka, to mak mana ni bugegi e buge moting'o ayanga pogruok mantie e kind weche Ruoth Nyasaye to gi weche Jonabii gi Joote. Kendo gin ema inyalo tiyo kodgi kuom yango weche mag jolony mondiki kaeto jomoko paro ni mago weche Ruoth Nyasaye, mondo girvit nono jogo maok olony ahinya kuom somo.

Jandiko nigi geno maduong' ni bugni biro miyo wagoo ondam maduong' ahinya motelo kuom ikruok gi ngima mamber mar winjo wach Ruoth Nyasaye kuom oganda ma wacho dholuo. Mano en nekech ondam mokuongo mar ngima gi dak maber en yango kendo ng'eyo Ruoth Nyasaye ma wuon piny ngima, kaeto timo kinda kuom dak eyor ratiro kendo ler.

Chakruok dak e ngima mar ratiro en yie kuom Ruoth Nyasaye to gi Jootene duto mane ooro kendo luwogi. Omiyo dwaro mar bugni en konyo jasomo mar oteni mondo ofweny yorno moriere ma ratiro.

OTE MA CHUOK MA KONYO NG'ATO KUOM YANGO MATUT NI TO DIN MARATIRO EN DIN MANE.

WECHE MOTELLO.

Mana kaka ong'eere e piny ngima nitiere dinde mang'eny mopogore opogore. To e kindgi nitiere dinde adek kende madongo ma wede. Dinde go gin : DIND JO YAHUDI, DIND JOKOPERE (JOKRISTO) TO GI DIN MAR ISLAM

KIDIENY MOTELLO:

JO ISLAM TO GI JOKRISTO GIN KAKA OWETE.

WAT MARGI WUOK KANYE?

1. MOKWONGO: *Ruodhgi ma ondiki e buggi en Ruoth Nyasaye manie Polo malo.*

Omiyo kata ka iwinjo ka jomaluuwo dinde ariyogi kawacho ni Nyasacha kata Nyasachwa en NG'ANE to bed ka ing'eyo ni Ruoth Nyasaye modak apanda ei polo malo en Ruoth Achiel kende mowinjore olam gi ratiro.

CHAKRUOK 24:6

Ruoth Nyasaye ma Nyasach polo gi piny ma nogola thurwa e dala wuora, kendo nosingorena ni nomi nyikwaya pinyni ema noor malaikane nyimi mondo iyud ni wuda nyako kuno.

MATHAYO 22:35-38

Achiel kuom jogo (Jo Yahudi to gi Jo Farisayo) ne openjo (Yesu) ka oteme ni, ‘Japuonj, to ei chike mag Torati, ere chik maduong’ molooyo? (Yesu) nodwoke, herr Ruoth Nyasachi gi chunyi duto, to gi muchi duto, to gi riekoni duto. Ma e chik maduong’ molooyo tee kendo mokuongo.

WUOK 20: 1-4

Ruoth Nyasaye ne owacho wechego tekowacho ni, an Ruoth Nyasachi mane ogoli e piny Misri, eod twech. Kik ibed gi nyiseche mamoko mak mana an. Kik ilos ranyisi moro amora kata kido mar gimoro amora man e polo, kata man e piny, kata man ei pi ebwo piny. Kik ikulrinegi kendo Kik itinegi.

CHAKRUOK 24:48

Ne akulora ma alung’ora ne Ruoth Nyasaye nyaka e low, ma apako nying Ruoth Nyasaye ma Nyasach Abraham.

KIDIENY MAR ARIYO

RUOTH NYASAYE ACHIEL TO GI JOOTE MA DHANO.

2. Wat mar ariyo: Yudore kuom Joote Ruoth Nyasaye.

Tiende ni Joote mag Jo Yahudi e Joote mag Jo Kristo to kendo e Joote mag Jo Islam. Kuom ranyisi, ibiro yudo e puonj mag dindegi tee ka Adam gi chiege ma Hawa (Kwe mar Ruoth Nyasaye obed kuomgi.) ema oyangi kaka oganda dhano mokuongo.

Jaote Noah bende oyangi kuonde tee ni ne oloso yie kuom chik Ruoth Nyasaye kendo joge ne otieki gi koth to gi oula kuom kwedo Ruoth Nyasaye to gi Noah (Kwe mar Ruoth Nyasaye obed kuome.) bende.

Joote mamoko kaka Abraham (Kwe mar Ruoth Nyasaye obed kuome.) bende otal. Jaote Lut mane joge otieki kuom ng'anyo ne wach Ruoth Nyasaye bende ne terore jomachwo giwegi, kaeto ne gitamore winjo kendo luwo Jaote Lut (Kwe mar Ruoth Nyasaye obed kuome.)

Joote mamoko kaka Yaaqub (Yakobo) (Kwe mar Ruoth Nyasaye obed kuome) ma bende ong'ere gi nying' mar Israel bende otal gi yawuote kaka Yusuf, Benjamin (Kwe mar Ruoth Nyasaye obed kuomgi duto.) Sigana mar Yusuf oyangi maler chakre kama ne ouse Misri (kaluwore gi nyiego to gi ich lit mane owetene otimone) ma bang'eno to obedo jatelo kuom jotelo mag pinyno.

Jaote Musa, Daudi, Suleiman (Kwe mar Ruoth Nyasaye obed kuomgi duto), duto otal e puonj mag dindegi tee kaachiel gi Joote mamoko.

KORO POGRUOK GI WUOK KANYE?

KIDIENY MAR ADEK.

JO YAHUDI OKETHO CHIK MOKWONGO.

Jo Yahudi emane otimo keth mokuongo kuom loso nyaroya mar dhahabu, ma gilame kaka ilamo Ruoth Nyasaye man e polo malo. Kendo ne ok giyie gi weche Jaote Musa (Kwe mar Ruoth Nyasaye obed kuome) gi chuny achiel.

RAPAR MAR CHIK 9:16

Eka ne ang'yo kendo nee kaka usetimo richo kuom Ruoth Nyasachu, uloso nyaroya ma ulamo kendo nee ukwedoru mapiyo piyo eyo mane Ruoth Nyasachu ochikoue.

ISAIYAH 43:10-11

Un joneno maga, Ruoth Nyasaye owacho kendo jaotena mane awalo, mondo ung'e, uyie kendo upar ni an e Ruoth Nyasaye, eng'eya onge Nyasaye moro amora kendo bang'a bende ok nobodie Nyasaye moro amora. An! Ee, an e Ruoth, bang'a onge jawar.

KORO EN ANG'O MANE MIYO GILAMO KIDO?

Kido kaka wang'eyo pile nigi wang'e to be oneno gi wang'eno? Ok kamano! Bende en gi ite to be owinjo gimoro gi ite no? Kendo dhoge bende en go to kuom adiera ok ginyal wuoyo. Kido ka po nono olwar piny, be onyalo chung' ewi tiende ma odog kama ne entie? Ok onyal!

Omiyo ka waseng'eyo ni kido ok nyal kata konyore owuon, koro jogo malamogi geno ni mondo kido go okonygi gi ang'o?

KIDIENY MAR ANG'WEN.

Richo Mar lamo Kido.

Richo mar lamo kido en e richo maduong' molooyo richo duto. Ma en nekech ma en richo maduong' magolo ng'ato oko e din mar Ruoth Nyasaye, nekech jal ma otimo mano oketho chik maduong' mokwongo mar Ruoth Nyasaye tiende ni obedo jakwedo. (Kafiri)

TIM JO LAWI 19:14

Kik ulokru ma ulam kido, kendo kik ulos nyiseche ma nono nekech an e Routh Nyasachu.

NEHEMIAH 9:16-17

To jogo gi wuonewa ne otwenyo umgi. Ne giketo sunga kendo girido ng'utgi (ne ok gilem kendo ok gilung're ne Routh Nyasaye), kendo ne ok giwinjo ma gimako chikene kata paro hono mane otimo ekindgi. Ne girido ng'utgi ma ging'anyo.

KIDIENY MAR ABICH.

JO YAHUDI NEGO JOOTE.

Jo Yahudi gi kendo ne ochako otimo richo moko kendo, ma ne en nego Joote mane Routh Nyasaye ooro, moro bang' moro, manyaka gikone to kendo ne gikadho kiego ma ging'anyo ne Jaote Yesu ma wuod Maryam (Kwe mar Ruoth Nyasaye obed kuomgi) mane oornegi. Kendo gin giwegi ema ne gipango mondo ginege. (bedo ni ne ginege kata ok ginege wabiyo ng'yo bang'e)

NEHEMIAH 9:26

To katakamano ne ok giwinji, kendo ne giwito chikeni e tokgi ma ginego jooteni....

LUKA 19:47-49

To Yesu ne puonjo pile pile e hekalu . To jodolo gi jondiko to gi jotelo mag jo Yahudi ne manyo yo mar tieke.

YOHANA 7:19

(Yesu ne owacho) enni Musa ne ok omiyou chike?To onge kata achiel kuomu ma rito chik?Ang'o momiyo udwanega?

YOHANA 7:1

To bang'mano Yesu ne wuotho e piny Galili nekech ne ok odwar wuotho ei Yahudi nimarjo Yahudi ne manyo kaka ginyalo nege.

Richo mar Jo Yahudi nyaka kae, wayudo ni mokwongo en ketho chik Routh Nyasaye mokwongo. Tim mamiyo jal motimeno yudo kuong' mar Routh Nyasaye mana kaka ondiki e muma.

RAPAR MAR CHIK 27:15

Okuong' ng'atno ma oloso kido, kendo ji nowachni amin.

RAPAR MAR CHIK 28:15

To chieng' ma initamri winjo duond Routh Nyasachi, ma iweyo mako chikene duto, eka kuong'gi duto biro tuch kuomi. Ibiro kuong'i e boma kendo ibiro kuong'i e dala be.

RAPAR MAR CHIK 27:26

Okuong' ng'atno ma ok oehungo chike mag toratini kuom timogi kendo ji tee nowach ni amin.

Richo mar ariyo mane gitimo ne en nego Joote Routh Nyasaye mane oornegi. Chal mana kagima Jo Yahudigo wacho ne Jonabi go ni (wach ma ubirogo ni ka uwacho ni oa ka Routh Nyasaye, wan wabiro negou nekech wang'eyo adiera ni wecheugi gin miriambo).

YOHANA 7:12— *Jo Yahudi wacho ni Yesu ja miriambo ma wuondoji.*

Jogo ma oyudo kuong' mar Routh Nyasaye inenogi gi wehegi, gi timbegi.

LUKA 11:43

(Yesu ne owacho) to mano kaka nobednu malit un jo Farisayo nekech uhero bedo nyime ei sinagogi, kendo umor ka imosou

*e chirni. To mano kaka nobednu malit nekech uchalo liete machon
ma Jogo makadho eiye okia gimoro amora.*

KIDIENY MAR AUCHIEL

JO YAHUDI ONG'ANYO NE INJILI.

JO RUMI 2:17

*To ka in Ja Yahudi kendo imako torati, ka ipakori gi nying Nyasaye,
kendo ing'eyo hera mare kaeto iyie gi timbe mabeyo, kendo opuonji
torati maber, kendo ing'eyo maber ni in to in jatend muofni, tachgi
malielnegi e mudho. Japuonj jomofuwo, Japuonj nyithindo matindo,
jang'eyo man gi rieko matut ei torati, kare in ma ijapuonj jomoko
ang'o ma omoni puonjori iwuon?*

LUKA 19:47

*To Yesu ne puonjo pile pile e hekalu. To jodolo gi jondiko to gi jotelo
mag Jo Yahudi ne manyo yo mar tieke.*

*Kane Jo Yahudi oseng'anyo ne injili mar Yesu, ne gikao Jo Rumi kar mane
ginyalo nekech gin emane gitelo ne pinyno ndalono. Jo Rumi ndalono ne pod gin
jopiny (Kafiri) (Jogo ma pod lamo nyiseche mopaa gi kido mopogore opogore.
Neok giluu chike Janabii Abraham omiyo ne ok tergi nyange) kendo gin ogogo
emane gichako dind jokopere (**Catholic Church**)*

*Jo **Rumi** tiende ni Jo Italia, yaani jo Italy, to **Catholic** tiende ni molworo piny
ngima kata eyo machuok, dind Jo Rumi momako piny ngima.*

NEHEMIA 5:8

Eka ne anyisogi, wan kuom tekrewa, ne wawaro owetewa ma Jo Yahudi mane ousi kuom jopiny.

TICH JOOTE 15:1

Jok mane owuok e piny Jo Yahudi ne olor kagipuonjo owetegi ni kaok oteri nyange kaka chik Musa wacho to ok inyal yudo warruok.

Penjo: Bende Jo Rumi ne olando din mane Yesu opuonjo? Koso ne gikiko kitgi gi timbegi kaachiel ei dinno? En ni Roman Catholic tiende ni wan duto walokre wabed Jo Itali? To ka en kamano to kare wamak dhoogi, koso kitgi, koso alam ma gilamo?

MATHAYO 5:17-18

(Yesu ne owacho) Kik upar ni a biro ketho chike mag torati kata joote motelo, ooyo, ne ok abiro ketho, ne abiro chopogi. Nekech adier adier anyisou, polo gi piny biro kadho, to nukta kata andiko mar torati achiel ok norum nyaka duto mane ochiki chopi ma timre.

KIDIENY MAR ABIRIYO

JO KRISTO LUWO ONDAMO.

Jo Kristo bende ne otimo mana kaka Jo Yahudi ne otimo kuom kwedo Jaote mogik, Muhammad (Kwe mar Ruoth Nyasaye obed kuome) mane oor ma okor wachne ei Torati to gi Injili.

RAPAR MAR CHIK 18:17-19

Eka Routh Nyasaye ne okona, gitimo maber kuom wacho kaka giwachono. An abiro kelonegi Jaote kowuok ei owetegi ma chalne chalo kodi (Musa) kendo abiro keto wechena edhoge, kendo obiro nyisou weche duto ma abiro chike. Kendo ng'at ma ok owinjo ma omako wechena ma Janabino biro wachonu, to abiro bandhe.

YOHANA 1:19-21

To ma e neno mar Johana ma Jabatiso kane Jo Yahudi oorone jodolo gi Jo Lawi kowuok Jerusalem mondo openje ni to 'in ng'a? To en ne oyango kendo ne ok okwedo. Ne oyango ni, ok an Kristo. Gipenje kendo ni to kare in ng'a? In Elijah? Owacho ni, ok an en. Koso in Janabi cha? odwoko ni ooyo.

QURAN 7:158

Wachi, (In Jaote Muhammad) "Un dhano, chutho an Jaote Ruoth Nyasaye kuomu un duto. Ruoth Nyasaye ma wuon piny Ruodh polo gi Piny. Onge jal mowinjore olam gi ratiro mak mana en. En ema ochiero kendo onego. Omiyo yie uru kuom Ruoth Nyasaye gi Jaote ne ma ok ong'eyo somo kata ndiko, to oyie kuom Ruoth Nyasaye gi chikene, omiyo luwe uru mondo uyud warruok."

YOHANA 15:16

(Eka Yesu ne owacho) "To ka enobi jakony no, ma abiro oronu kowuok kuom Wuoro, Roho maradiieri mowuok kuom Wuoro. En obiro timomu nenda".

TICH JOOTE 7:37

Musa onogo emane onyiso Jo Israel, Ruoth Nyasachu biro kelonu Janabi kowuok ei oweteu kaka an, omiyo winjeuru.

MATHAYO 21:42-45

Eka Yesu ne owachonegi, donge ne usomo ei andiko, kidi mane jogedo oseyo ema osebedo kidi motegno mar kona. Wachni owuok kuom Ruoth Nyasaye, kendo en wach ma hono ewang'wa? Omiyo anyisou, ni piny Ruodh Polo ibiro daro kuomu (Jo Yahudi) kendo ibiro miyo oganda mamoko ma biro kelo nyak mare. Jodolo gi jofarisayo kane owinjo ranyisige, ne gifwenyo ni owuoyo e wigi"

Gimomiyo Jo kristo okwedo Jaote Muhammad chalre gi gik mane omiyo Jo Yahudi okwedo Yesu (*Kwe mar Ruoth Nyasaye obed kuome*) kendo chalre gi gik mane omiyo oganda duto tee mosekadho okwedo Jootegi (**ka gilando ni Jaote Ruoth Nyasaye jamiriambo).**

Ka ing'yo *Yohana 7:12* ibiro yudo ka Jo Yahudi ne one ka lando ni Yesu (*Kwe mar Ruoth Nyasaye obed kuome*) en jamiriambo. En richo maduong' miwuoro, kaachiel gi ayanga maler mane obirogo mar Injili. Jo Kristo bende wacho ni ondiki ei Muma ni Jonabi mag miriambo biro sieko, kaeto giwacho ni Jaote Muhammad en Jaote mar miriambo.

KIDIENY MAR ABORO

JAOTE MUHAMMAD EN JAOTE MAR ADIERI KOSO MAR MIRIAMBO?

We mondo wan bende wang'i anena kaka wanyalo fwenyo Jaote mar miriambo gi Jaote madijera.

Wang'ii anena ranyisi maluwo ni:

Ineno nade ka ng'ato obiro eodi kaeto onyisi ni en obila, kendo ni mondo umakrukode mondo udhi e tesend obila man machiegni, in ditim nango?

Ibiro kwae mondo ogol kipande manyiso ni en obila. Kipande mar Muhammad (Kwe mar Ruoth Nyasaye obed kuome) en buk mar Quran ma kane bedni owuok kuom jal machielo mopogore gi Allah to dikoro uyudo kosa mang'eny a hiya eiye. To nekech Jaote Muhammed (Kwe mar Ruoth Nyasaye obed kuome), ne ok ong'eyo somo kata ndiko, ere kaka onyalo ndiko buk to tij ndiko buge en tij jolony mosomo?

KIDIENY MAR OCHIKO

ENNI MUHAMMED EMANE OLOSO QURAN?

QURAN 2: 1-4

Kuom Nying Routh Nyasaye ma Jares Kod Miwafu duto.

- 1. Alif Laa Miim***
- 2. Ma en buk maonge gi kiawa eiye. En warruok ne jogo moluoro Routh Nyasaye.***
- 3. Jogo ma oyie kuom maling' ling' (tek ni Ruoth Nyasaye gi Jaote ne osewacho) kendo gilemo maonge ng'ikruok kendo gigolo Mich (sadaka) kuom mago ma wagedhogi go***

4. To gi jogo moyie kuom mago mane wafuenyoni to gi mago mane wafueny moteloni, kendo giyie ni nitiechieng' giko piny.

Buk mar Quran konyo dhano dak maber ewang' piny ka to gi ngima mabiro bang'e e polo malo, mana kaka otelone anyuola mopogore opogore to gi oganda engima gi. Kendo itiyo kode kuom telo ne piny kaka kitap chike mar katiba. To bende en gi teko mar telone piny ngima e okang' mar anyuola, siasa, ohala, timbe mag oganda, doho mar chike, arita mar kwee, kendo en konyruok ne dhano e okang' moro amora mar ngimane.

Quran ni tin ndi to kata kamano en ema itiyo kode kuom rito oganda e pinje mosedongore e okang' mag ohala, arita mar kwee, lony mar rieke to gi siasa.

Donge uneno ka katiba mag pinyni dvaro ji mang'eny ma jolony (ngire) ema mondo olosi? Kendo bang' higni machuok to iwinjo ni katibano nigi rem mang'eny ma idvaro mondo loke manyien? Ka jomane olosi katiba onogo gin ji ma olony mane okao thuolo malach kagisomo?

QURAN 2:23-24

To ka un gi kiawa kuom mago mane wafuenyone jaotewa, (ka uparo ni ok owuok ka Nyasaye) kare losieuru sura achiel machal kode, kendo ugwel nyiseche moko mondo obi okonyu ka un jo adieri. To ka ok utimo, nekech be ok unyal timo, to kare luor uru mach mager ma yiendege en dhano gi kite ma oiki ne jomokwedo.

KIDIENY MAR APAR.

HONO MAR MOHAMMED.

*Uneno nade, donge en **HONO** maduong' miwuoro ka jakwath rombe e thim
kuchu nyalo kelo katiba marito piny ngima?*

*Katiba ma kuom higni moloyo 1440 mosekadho pok oyud gi rem kata kosa moro
amora kendo pok oloki, kendo kata mana tekre pok odok chien nekech en
katiba ma jarit mare (**mondo kik lwet dhano ketie mibadhi**) en Allah
Routh Nyasaye nyaka chieng' giko.*

*Bende nitie buk moro amora mar jalony moro amora ma oseloko pach oganda
mag piny ei piny mangima moloyo Quran?*

Muma ma bende nigi joherane mathoth ewang' piny ka, nigi jondiko adi?

*Omiyo Quran en e hono maduong' mogik mar Jaote Mohammed (**Kwe mar Ruoth
Nyasaye obed kuome**), to kendo en e hono maduong' moloyo Joote duto mane otelone
nekech en e hono mosiko manyaka chieng'.*

KIDIENY MAR APAR GI ACHIEL

DIN MA JOOTE DUTO EN ISLAM

*Kaluwore gi puonj mane Joote tee opuonjo nyaka ne piny chakre, ni Routh
Nyasaye en achiel, ma en Ruodh polo gi piny, koro nenore ayanga ni din mar
Adam en e din mar Noah, to bende din mar Abraham to gi Joote duto (**Kwe mar
Ruoth Nyasaye obed kuomgi duto**). Emomiyo din mar Mohammed (**Kwe mar Ruoth Nyasaye obed
kuome**) en e din mar Adam gi Hawa (**Kwe mar Ruoth Nyasaye obed kuomgi**) to kendo e din
mar Joote duto nekech ng'ato ok nyal bedo Ja Islam nyaka oyie gichunye kendo
oyangi edhoge ni Ruoth Nyasaye en achiel kendo Joote ne gin Joote ma adiera.*

Islam (**bolruok**) en ka ng'ato oyie kuom Ruoth Nyasaye kendo omako chikene kuom hero mare maok ochunego. Omiyo puonj mag Jaote Mohammed (*Kwe mar Ruoth Nyasaye obed kuome*) ok kwedre gi puonj mag Joote mag Ruoth Nyasaye kata achiel.

Gimomiyo Jo Kristo okwedo kendo ong'anyo ne Jaote Mohammed (*Kwe mar Ruoth Nyasaye obed kuome*) ema ne omiyo Jo Yahudi okwedo Jaote Yesu wuod Mariam (Jaote Issa) (*Kwe mar Ruoth Nyasaye obed kuomgi*). Joote tee ne oyudo lweny mager kuom jotelo mag piny to gi ji endalogi. Ji ne ng'anyo ne yalogi kane gijarogi, giyanyogi kendo moko ne igoyo ma negi tikli.

KIDIENY MAR APAR GI ARIYO

GIMAKELO NG'ANYO KUOM JOTELO MAG PINY.

Magi duto yudore mana nekech kuong' mar Ruoth Nyasaye ma jotelogi yudo kuom ketho chike Nyasaye, mokuwongo keto ng'anyo ne Joote.

Kaeto gibedo ni giloko wach Ruoth Nyasaye ma obed mopogore kaka ne en e ndalo Joote, kuom medo, golo to gi loko tiend weche Nyasaye kaeto giwacho ni “**magi gin weche Ruoth Nyasaye**”.

Ka po nono ni onge winjruok ewachni, ka ng'ato wacho ni Muma oriere tir, kare ong'i anena Muma ma jokopere (**Catholic**) tiyogo to gi ma jomowar tiyogo. Moro ka moro oramo ni mare emaber kendo ler.

Jokopere gwandore gi jomowar ni ang'o momiyo giweyo weche moko e Muma ma gitiyogo, to jomowar bende oramo ni jokopere ema otimo rondo gi Muma. Koro ka Muma ariyogo opogore kamano, ere kaka dang' wawach ni en Muma Maler?

En ng'a ma medoga wach Nyasaye to en ng'at mane ng'adogi? Timbegi mag manyo kuong' mar Ruoth Nyasaye miyo giwacho weche maok odhi kare ewi Ruoth Nyasaye. Ere kaka inyalo yie gi wach ng'at mamiyi sigana mar jal moro ma rabora ahiya to eiye no be okoni ni en nyadundo. Kata ni en jal ma sihwal to eiye no bende ni en dichol?

Jayalo ma Ja Kristo chako yalo mare maber ka okoni ni Ruoth Nyasaye en achiel to kapok odhi mabor to kanyo kanyo okoni ni gin Nyiseche adek. Tiende ni oyie ni Nyasaye en achiel e chak yalo mare kaeto kanyo kanyo okwedo yie no kuom wacho ni nyiseche gin adek.

Kaeto otimo marach mogik kuom wacho ni “ Yesu en wuod Nyasaye”. Kaeto ma bende okwedo ka owacho ni Yesu no ene Nyasaye maduong mogik ; Weche mag urruok, gi neko.

KIDIENY MAR APAR GI ADEK

CHAL MAR YESU.

Ka ipenje ni to, ang'omomiyo ipako Ruoth Nyasaye gi chal maok mare? (mar nyuolo nyathi) to Joote motelo to ne opako Ruoth Nyasaye gi pak mogundho mabeyo beyo?.

*Owacho ni, “**nekech Yesu** (Kwe mar Ruoth Nyasaye obed kuome) **ne onywol maonge wuon mare**”.*

To kata kamano ka wang'iyi chal mar Adam (Kwe mar Ruoth Nyasaye obed kuome) kuom ranyisi, ne ochueye maonge wuon kata min mare. To Hawa ma chiege to ochue kowuok kuom ng'et Adam. Omiyo en (Hawa) engi wuoro to oonge miyo. To Jaote Yesu be nigi miyo to oonge wuoro (Kwe mar Ruoth Nyasaye obed kuomgi). Omiyo hono mar nyuolo Yesu (Kwe mar Ruoth Nyasaye obed kuome) maonge wuon mare ok lich maloyo

Adam gi Hawa (*Kwe mar Ruoth Nyasaye obed kuomgi*). Omiyo adiera mare en ni Yesu en wuod Maryam (*Kwe mar Ruoth Nyasaye obed kuomgi*). Weche moko maok odhi kare ni Yesu (*Kwe mar Ruoth Nyasaye obed kuome*) en wuod Nyasaye en wach mapek miwuoro nimar dhano yanyo Nyasaye, nekech gipake gi chal ma ok owinjore kode mar nyuol. Ma en chal mar chuech Nyasaye to Ruoth Nyasaye onge rem kata gombo moro amora. Ok odwar nyathi kata jakony nekech oromo ma kata onge dhano, nyathi kata muya.

KIDIENY MAR APAR GI ANG'WEN.

ENNI RUOTH NYASAYE BE NIGI NYITHINDO?

Wang'ii anena nito, bedo nade ma ng'ato koro luong ni wuod ng'ane?

Bende inyalo luongo nyathi moro amora makadho ni “**wuoda**”? Ooyo, mano ok nyalre nekech nyathi ka nyathi nigi wuon mare to mondo ibed gi nyathi nyaka to ikadhie migepe moko kaka:- nyaka to ibed gi dhako midhinyuologo nyathino, kaeto itim timbe tee mowinjore itim mondo nyathi oyudre.

Omiyo ka wayango ni Jachuech piny gi polo nigi teko mayore kendo chal mare opogore ahinya gi gigo mochweyo, nyaka to wapake mana gi pak maber mogik maonge maloye. Ayany kuom Ruoth Nyasaye ma wuon piny ngima bedo mana ka dhano ochako njore mare mar pimo Jachuech gi chuechne kendo ketone nyathi ni onywuol (*Ruoth Nyasaye oumwa gi wich rach machalo kamano*) nekech kaok onywomo min mare ere kaka ng'ato nyalo wacho ni en wuon nyathi no?

Omiyo Yesu en wuod Maryam (*Kwe mar Ruoth Nyasaye obed kuomgi*) mana kaka Quran wacho, kendo en Jaote moluor ahinya mar Ruoth Nyasaye mane onywuol kuom

hono maonge wuon mare mana kaka Adam gi Hawa (Kwe mar Ruoth Nyasaye obed kuomgi).

KIDIENY MAR APAR GI ABICH.

JOYALO WIGI OMBACHNI.

Koro ng'ii mondo inee kaka joyalo ma Jo Kristo seche ma giyalo. Kaka ne waneno motelo enni jayalo chako yalo mare kowacho ni Nyasaye en achiel. Kaeto kodhi nyime to owacho ni nyiseche gin adek. Tiende ni oyie kar chakruok ni Nyasaye en achiel kende, kaeto bang'eno to okwedo mane owacho motelo.

Kanyo emakoro ochake timbe ong'ongruok mar loko kido ka owacho ni “to kuom adier gin nyiseche adek”

To mago bende okwedo ka owacho ni, “Yesu (Kwe mar Ruoth Nyasaye obed kuome) en wuod Nyasaye. Tiende ni koro owacho ni nitie nyiseche ariyo to machielo ok oromo. Kendo onyalo dhi nyime kowacho ni Yesu onogo koro en Nyasaye.

Dine bed ni nitie nyiseche mang'eny, moro ka moro dikoro dwaro ni mondo dwache ema mondo otimre to mar nyawadgi orit mondi. King'iyi maber to ibiro yudo ni kata mana lweny nyalo wuok ekindgi.

KIDIENY MAR APAR GI AUCHIEL

CHAL MAR RUOTH NYASAYE.

Ka giwacho ni Yesu (Kwe mar Ruoth Nyasaye obed kuome) en Nyasaye, kare wang'ii ane ni to Joote motelo to ne opuonjo ji ang'o kuom chal mar Ruoth Nyasaye ma wuon piny ngima.

Mokuongo Joote duto oyiere eachiel ni Ruoth Nyasaye nigi ngima manyaka chieng'. Tiende ni ok onyal tho kata mana matin. Omiyo Ruoth Nyasaye ok nyal tho.

To jayalo mawacho ni Yesu (Kwe mar Ruoth Nyasaye obed kuome) en Nyasaye ok tieki maok owacho ni Yesu (Kwe mar Ruoth Nyasaye obed kuome) ne otho e msalaba. Omiyo wechegego tiende ni chal mar Yesu (Kwe mar Ruoth Nyasaye obed kuome) opogore ahinya gi chal mar Ruoth Nyasaye. Tiende ni Yesu (Kwe mar Ruoth Nyasaye obed kuome) nyalo tho to Ruoth Nyasaye to ngima mosiko.

Nekech kanyalo bedo ni Nyasaye ne otho kuom thuolo moro machuok kata malach, nyiso ni chal mare mar ngima mochuere cha koro onge. To mano e paro ma jayalono temorucho e pachji mondo gibed gi kiawa ewi Ruoth Nyasachgi.

Chal machielo mar Ruoth Nyasaye en ni ok onindi. Achiel kuom chal mare en ni ong'eyo gik moko duto. Tiende ni ok ochal gi dhano. Nekech ka Ruoth Nyasaye nyalo nindo, be pod onyal bedo ni ong'eyo gik moko duto?

Un joyalo, bende nitie seche mane Yesu (Kwe mar Ruoth Nyasaye obed kuome) onindo? Ka nitie to nyiso ni Yesu (Kwe mar Ruoth Nyasaye obed kuome) ok en Nyasaye Nekech ne onindo, ochiemo, kendo nitie gik moko ma okia. Kuom mano ok onyal bedo Ruoth Nyasaye nekech Nyasaye ok nindi kendo ong'eyo gik moko te.

ZABURI 121:2

***Konyruok mara wuok kuom Ruoth Nyasaye mochuero polo gi piny .
Ee! ayula wang' ok notere to bende ok nonindi .***

KIDIENY MAR APAR GI ABIRIYO.

BE YESU EN NYASAYE?

Chal mar Ruoth Nyasaye en ni ok ochiem. Oonge dwaro mar chiemo kata mana matin.

We wang'i ane ni to ang'o momiyo Nyasaye ok chiem to en ema ochueyo gund chiemo te ewang' pinyka, olembe, kothe, lee mag ring'o to gi pi mamit mar modho.

To ka wang'iyi kaka dhano ohero chiemo, waneno kaka oketo tulo malich kuom manyo chiemo. Owete negore nekech puodho. To jatend migao e sirkal bende timo duto monyalo mondo okwal kuom oganda mondo obedie mana gi ot loka Amerka kata thurgi odiero apala mondo oyudie chiemo maber. Jakuo fucho ong'weyamo mag ji mondo ong'iew chiemo. Enni be Nyasaye nyalo chiemo?

Joote ne odwoko penjoni ka giwacho ni "ok nyalre"! Ruoth Nyasaye nigi chal maler kendo oonge gombo ewi gimoro amora, kech bende ok kaye. To jal moro amora machiemo nyaka to dhi e choo mondo okonyre. Ma ok en chal mar Nyasaye, iparo nade Nyasaye madhi (pielo) losore ei choo kosechiemo?

Omiyo Ruoth Nyasaye ok owinjore wapake gi pak mag anjao machalo kamano nekech oonge gi gombo mar chiemo bende oonge kech. Omiyo wapenjo joyalo ni to, Yesu (Kwe mar Ruoth Nyasaye obed kuome) be ne ochiemo?

Kane ochiemo to nyiso ni choo bende ne odhi. Omiyo chal mar ler ma Ruoth Nyasaye nigo Yesu (Kwe mar Ruoth Nyasaye obed kuome) ok nyal bedo go nekech en dhano mana kaka an gi in. Omiyo kata mana jal ma giluongo ni baba maler kata (POPE) ka po nono ni en bende ochamo kuon to nyiso ni oonge ler moro amora nekech kodhi e choo to nyaka to imak umi.

KIDIENY MAR APAR GI ABORO

YESU ONDUSI (OTER NYANGE)

Ndiko wacho maler ni Yesu (Kwe mar Ruoth Nyasaye obed kuome) ne ondusi. Omiyo ka joyalo wacho ni Yesu (Kwe mar Ruoth Nyasaye obed kuome) ne ondusi, tiende ni ginyisowa ni en ng'a mane ondusi to en ng'a mane onduse? Joyalogi nigi winjo mane ka gilando ni Yesu (Kwe mar Ruoth Nyasaye obed kuome) ne oter nyange kendo en Nyasaye?

*Ka Yesu (Kwe mar Ruoth Nyasaye obed kuome) en Nyasaye to nyaka bedie ni en ema ogolo chik mondo ji oter nyange. Ochakobedo nade ka dhano onogo ema kendo omako nyamarich (**pala ma itimogo nyange**) ka onduso Nyasaye? Be wanyalo dhialo ng'ato ang'ata gi lemo [cheo kata migao] mar Nyasaye? En ng'a ei joyalogi man gi teko mar pogo lemogi kaka ohero kuom ng'at ma oheroni in koro in Nyasaye to in to bed malaika to in to amiya obel sibuth?*

Andiko to koro ee wacho ni Yesu (Kwe mar Ruoth Nyasaye obed kuome) ne oter nyange, pod iyie ayiea ni Yesu (Kwe mar Ruoth Nyasaye obed kuome) en Nyasaye?

QURAN 4:172 Messiah ma wuod Maryam ok nonee pek kuom bedo jatich Ruoth Nyasaye, kata mana malaika machiegni gi Ruoth Nyasaye bende ok none pek kuom bedo jotichne. To jogo mabiro neno pek kuom bedo jotichne ma gisungore ka ginyiso tok teko, to obiro chokogi kanyachiel ma nodirgi ei mach mar ataro.

ISAIAH 43:10-11

Un joneno maga, Ruoth Nyasaye wacho, to jatichna mane ayiero, mondo mi ung'e ma uyie ma uyangi ni an ema an Ruodhu. Kapok abedo ne onge Ruoth moro amora kendo bang'a bende ok no bedie

Ruoth Nyasaye moro amora. An! Ee! ng'eni an e Ruoth, onge Ruoth moro kendo moloya.

Koro kaka waseneno, kuom ranyisi ma kende mowuok ei wach Nyasaye, Jonabi duto gi Joote gin jotich Ruoth Nyasaye mane odhialo mondo otine Ruodh Piny gi Polo. To en bende ema oluongogi ni jotichne mana kaka mamoko kuom chuechne gin jotichne.

KIDIENY MAR APAR GI OCHIKO.

HERODE DWARO NEGRO YESU.

Nyasaye nigi teko ewi gik moko tee kendo onge gimoro amora manyale. Joyalo ma Jo Kristo wacho ni kane Yesu (Kwe mar Ruoth Nyasaye obed kuome) pod kidoro, Herode ne nego nyithindo nyaka en bende poth onege, ma ochuno min mare gi won mare (Maryam gi Yusuf) mondo oring matek ka gipondo nyaka Misri ma nyaka Herode magoro okao.

Omiyo ka Joyalo wacho ni Yesu (Kwe mar Ruoth Nyasaye obed kuome) en Nyasaye to mano tiende ni giwacho ni Nyasaye ne luoro omako ma ochune ni mondo odhi Misri nekech oluoro johweny Jorumi. Be en adier ni Nyasaye nyalo pondo kuom luoro? Enni be en adier ni Nyasaye en ngoro? Kendo en mana luoro mar johweny Jorumi?

KIDIENY MAR PIERO ARIYO.

MOHAMMED EN JAOTE RUOTH NYASAYE, ALLAH.

Omiyo weche mag Jaote Mohammed (Kwe mar Ruoth Nyasaye obed kuome) gin e weche madiere nekech ONGE JAL MOWINJORE OLAM GI RATIRO MAK MANA ALLAH

kendo MUHAMMED EN JATICHNE KENDO JAOTENE. TO YESU MA WUOD MARYAM OK EN NYATHI NYASAYE MAK MANA JAOTE NYASAYE (Mane ooro ir jo Yahudi to ne gidage)

Wehegi ema ng'ato wacho gi dhoge kendo gi chunye ma iye ka odonjo e din mar Islam. Ok kaka jowasigu mag Islam fuong'o weche maok odhi kare ewi din mar Allah. Mago gin weche mag aoyae ma gilando ka gidwaro mieno Islam gi jo Islam chilo mondo oganda tee ochaa Islam gi Jo Islam, mondo jogo madwaro donjo ei Islam kik donji eidin mar Ruoth Nyasaye ma wuon piny ngima, kendo Routh man gi nyalo ma ok loo.

Omiyo ka iwinjo ma iyieri gi mago duto ma waseleronu ei bugni kendo idwaro donji ei din Mar Islam wakwayi nikik iketh seche mang'eny kuom chiko iti e weche manono mag ji. Tem matek mondo iring matek kuom yie ni Ruoth Nyasaye ma Jaloch nitie, kendo ni en Ruoth Nyasaye achiel kende. Kendo ni onge Nyasaye mopogore kode. Oonge riwruok gi ng'ato e Piny Ruodhe mar Polo gi Piny kendo ni kik walam nyiseche manono mak mana Ruoth Nyasaye ma wuon oganda tee.

Kendo iyieri ni Allah nigi chal mathoth, duto gin pak mabeyobeyo maonge rem kata matin kaka joyalo mang'eny wacho mondo gigeng'neji wach Nyasaye mondo gidhi mana nyime gi yako mwandugi maonge penjo. Ng'at madhi nyime gi timbe gi biro donji eimach maonge kiawa.

Kaeto iyie kuom joote Ruoth Nyasaye duto maonge akweda kaka ne Jo Yahudi otimo ka ne gikwedo Yesu (Kwe mar Ruoth Nyasaye obed kuome), to gi kaka Jo Kristo okwedo Jaote Mohammed (Kwe mar Ruoth Nyasaye obed kuome)

To mogik, wamiyi wach maber ni warwaki gi chuny motur ei Islam nekech wan oweteni kuom yie.

**KWE MAR RUOTH NYASAYE, GI NG'UONO, GI GUETH
MARE OBED KODU DUTO...**

AMIN.

Oteni otiek ndiko tarik:

15th August 2016 ma chalre gi Tarik 11 Dhul-Qaadah 1437

Kuom nyalo maduong' mar Allah, kendo en ema oromo gi pak duto.

Jandiko: Sheikh Saleh Kyambo

Email: risalabooks@gmail.com

Mobile: +966 594 370 352

KINGDOM OF SAUDI ARABIA

Jaloko e Dholuo: Sheikh Omar Al-Bashir

Email: omarbashirshii@yahoo.com

Mobile: +254 702 440 0 88 [All Social Media]

Airtel: +254 750 401 105

KISUMU, KENYA